



Enfrontar a crise desde as institucións europeas

Europa debe ter o protagonismo que ata o de agora non foi capaz de asumir. A crise é de tal magnitude que está a poñer en dúbida os cimentos do logro máis importante do noso continente: a Unión Europea.

As institucións europeas deben aceptar que as políticas de austeridade que impuxeron na pasada crise debilitaron os mecanismos de protección social e laboral nos que se está cebando a pandemia e renunciar a elas definitivamente para enfrontar a crise de forma verdadeiramente solidaria.

Ata o de agora, a duras penas, alcanzouse un acordo para liberar unha primeira partida de medio billón de euros destinados a enfrontar os efectos máis perniciosos da crise. Pero fai falta máis decisión e vontade política. Necesitamos unha verdadeira ferramenta unitaria de investimento en Europa e unha iniciativa fiscal coordinada. Nesta conxuntura urxe impulsar a capacidade para emitir débeda común que axude a financiar un gran plan de choque europeo contra a crise e pola reconstrución económica. Os sindicatos españois, xunto á Confederación Europea de Sindicatos, traballamos nesa dirección, porque non está en xogo unicamente a recuperación das economías nacionais. Está en xogo o futuro da Unión Europea.

Confinamento polo COVID19

Traballo e servizos públicos: outro modelo social e económico é necesario



Celebramos o 1º de Maio, Día Internacional do Traballo, no medio do confinamento motivado polo COVID-19, virus que percorre o mundo e que se manifestou con especial incidencia no noso país. Todo se viu afectado pola extensión da pandemia; miles de persoas faleceron; o noso tecido produtivo quedou gravemente tocado; millóns de postos de traballo están en perigo; e centos de miles de persoas atópanse sen recursos fronte á crise.

O 1º de Maio, xornada de solidariedade internacionalista

O COVID-19 está a afectar a todo o mundo, aínda que o faga con diferente intensidade e en todo o mundo púxose de manifesto a fragilidade e inxustiza do modelo social e económico imperante. O 1º de Maio é a mellor ocasión para reivindicar unha nova orde mundial máis xusta e solidaria que sitúe ás persoas e o seu benestar por diante dos intereses económicos duns poucos. É tamén a ocasión de lembrar a memoria dos e das sindicalistas que son perseguidos, despedidos, ameazados ou asasinados en calquera lugar da terra por defender ese mundo máis xusto, no que a repartición da riqueza, o valor do traballo e a liberdade sindical van da man.

Unha vía diferente. Enfrontar a crise no noso país

Desde o primeiro momento as organizacións sindicais temos presentado propostas para evitar que a crise destrúa emprego e deixe na pobreza máis absoluta a amplas capas da nosa cidadanía: a promoción e primacía dos mecanismos de axuste temporal, as suspensións e reducións de xornada -a través do mecanismo dos ERTE-; as prestacións por desemprego a contador cero para todas as persoas afectadas, tivesen ou non adquirido o dereito ás mesmas; as axudas e subsidios extraordinarios, etc. son, en gran parte, o resultado da esixencia sindical no marco do diálogo social. Son instrumentos aínda insuficientes, pero que situaron a resposta á crise nunha vía diferente, centrada na atención aos problemas das persoas e nunha nova forma de percibir as necesidades deste país.

Queda moito por facer

Agora, é necesario prorrogar os mecanismos de axuste temporal do emprego, deseñados para o estado de alarma, o tempo que sexa preciso para soste-lo noso tecido produtivo e a supervivencia digna das persoas traballadoras. É imprescindible cubrir as necesidades daquelas que carecen de calquera tipo de prestación. Con esta finalidade, o movemento sindical esixe a regulación urxente dun Ingreso Mínimo Vital, como xa fixemos na lexislatura anterior

#OtroModeloEsNecesario

promovendo unha Iniciativa Lexislativa Popular. E debe garantirse que a recuperación da actividade económica se leve a cabo sen poñer en risco a saúde dos e das traballadoras.

Pero hai que ir máis aló e determinar as liñas dun novo modelo produtivo e social que sempre reivindicamos e que a crise do coronavirus demostra que é inaprazable. Máis e mellores servizos públicos: sanidade, atención ás persoas maiores e ás dependentes, educación, etc. Intervención pública nos sectores estratéxicos (enerxía, subministracións, servizos financeiros, industria) que garanta, ao mesmo tempo, a resposta ante situacións críticas e unha maior eficiencia e menor dependencia dun mercado que se articula baixo o principio do máximo beneficio e que carece de sensibilidade ante os problemas das persoas. Inversión en ciencia, tecnoloxía e innovación, que oriente a recuperación cara un modelo de desenvolvemento económico xusto e medioambientalmente sostible.

Para todo iso, é necesario un gran pacto. Un pacto ao que as organizacións sindicais estamos sen dúbida dispostas, pero que para que teña éxito debe contar co compromiso do conxunto de forzas políticas. Estamos nun momento transcendental na historia do noso país. Todas as forzas políticas, económicas e sociais deben actuar unidas se se quere estar á altura das circunstancias.

Un 1º de Maio dedicado ás persoas traballadoras que están en primeira liña

As persoas que a pesar do risco de contaxio e de os deficientes medios de protección están a salvar vidas, axudando ás persoas maiores, dependentes e con discapacidade, as que garanten o funcionamento dos servizos esenciais que require a nosa economía son as verdadeiras protagonistas desta crise. Tamén o son aquelas que teletraballan e as que se reincorporaron á actividade, as que perderon o emprego ou non o tiñan e vailles a ser máis difícil atopalo. Todas elas son un exemplo para este país e non debemos esquecerlo cando isto pase. Para lembralo hoxe e sempre, neste Primeiro de Maio o movemento sindical réndelles homenaxe.

As nosas reivindicacións neste 1º de Maio

En tanto que organizacións internacionalistas e solidarias, somos conscientes de que só unha resposta global pode ser a solución a unha crise global. A solidariedade e a colaboración sindical internacional ten neste momento, neste Día Internacional, máis importancia que nunca. Conscientes de que este é un 1º de Maio especial, atrapados polo coronavirus e o confinamento, sen manifestacións nas rúas e sen actos públicos, faremos da mobilización das ideas en centros de traballo, medios de comunicación e redes sociais a nosa principal manifestación:

1. Reivindicamos un novo modelo económico e social cuxa prioridade sexan os dereitos e o benestar das persoas.

2. Reivindicamos o traballo como principal factor de cohesión social, exemplarizado neste tempo polas traballadoras e traballadores dos sectores esenciais e dos servizos públicos, de maneira singular, por todo o persoal sanitario.

3. Reivindicamos condicións de traballo dignas e salarios suficientes, e denunciaremos as reformas que se fixeron para devaluar e precarizar o emprego.

4. Reivindicamos o papel da muller traballadora nunha sociedade máis igualitaria e xusta. Moitos dos sectores laborais que hoxe están a salvar vidas, facilitándonos a provisión de alimentos ou evitando que se estenda a pandemia, son sectores feminizados, nos que moitas destas traballadoras non chegan nin a milleuristas.

5. Reivindicamos, hoxe con máis forza se cabe, unha Unión Europea máis social e politicamente máis unida e máis solidaria.

6. Reivindicamos algo que sempre consideramos un alicerce esencial do Estado de benestar, os servizos públicos, que sufriron os recortes durante a xestión neoliberal da crise de 2008 e cos que algúns poderes autonómicos asaíáronse e que deben ser considerados un ben social agora e sempre.

7. Reivindicamos, ante o drama humano, social e económico que está a causar o coronavirus, que as políticas públicas (e tamén privadas) atendan sobre todo ás persoas e sectores máis vulnerables. Neste sentido, hai que poñer en marcha canto antes un Ingreso Mínimo Vital.

8. Reivindicamos un Pacto de Estado para combater o COVID-19 e reconstruír a estrutura económica e produtiva do noso país, garantindo que non deixamos a ninguén atrás. Sindicatos e organizacións empresariais estamos chamados a xogar un papel determinante neste proceso.

9. Reivindicamos o impulso de políticas sectoriais no curto prazo nos sectores que máis van sufrir a caída de actividade, así como a recuperación dunha base industrial para o noso país que garanta o aprovisionamento de bens básicos. Tamén o investimento en Investigación, Desenvolvemento e Innovación, que no ámbito sanitario, pero non só nel, volven demostrarse imprescindibles para un país.

10. Reivindicamos unha estratexia económica e social de desescalada e saída da crise acompañada dun cambio de modelo produtivo, respectuoso co medio ambiente e asentado no emprego estable e con dereitos.

Viva o 1º de Maio!

Vivan as traballadoras e traballadores de todo o mundo!

#OtroModeloEsNecesario